


République du Sénégal



Ministère de l'Education nationale

CP

Deftere ciimti

Pulaar

2019



Ce travail est disponible sous la licence Creative Commons Attribution 3.0 IGO. Sous cette licence, il est accordé le droit de copier, de distribuer, de diffuser et d'adapter ce cahier de récits y compris à des fins commerciales selon les conditions énoncées sur le site électronique suivant:

<https://creativecommons.org/licenses/by/3.0/igo/>

Dame deftere ndee

| | |
|---|----|
| Gese | 2 |
| Joom oto e dadiido | 4 |
| Nguurndam mem haŋki | 6 |
| Daarol Maalaw | 8 |
| Nguyka fowru | 10 |
| Dewgal 'Bayal Demmba | 12 |
| Fowru e Njombolo | 14 |
| Kosam enndu | 16 |
| Jontinooje | 18 |
| Ndogu reedu | 20 |
| Ndunngu | 22 |
| Ceedu | 24 |
| Darnde debbo pullo e nder renndo mum | 26 |
| Nguurndam leňol haŋki | 28 |
| Njeeeygu kosam e nebam | 30 |
| Hakkunde debbo nayeejo oo e njur-demmba | 32 |
| Farmata e Kummba | 34 |
| Hakkunde Njur-Demmba e kaaw-Bojel | 36 |
| Kawgel burdo Wonde suka | 38 |
| Sammба | 40 |
| Sooroyamma | 42 |
| Dennaboo | 44 |
| Debbo jeeyatđo gertoode | 46 |
| Wasiyaaji fa'de e duhiido | 48 |
| Hono maafe gerte defirtee to fuladu | 50 |

Gese

Ndunngu hikka moyyii hudo e gawri keewii.

Yero e Rama nduumi ko to dowri. Ko toon be ngoni haa gaweele coňaa. Be tawtonaama golle dee fof. So worbe bee ndawii, heen sahaaji Rama defa bottaari, Pawa bar meeji, fitta dinngiral galle, yooga loode. Heen sahaaji ko kaňko biroyta na'i.

Yero noon, so tawii o yahaani gese, o wona e wadture tibaaji cuudî.Jamma, be badtoo neene mabbe, oon tinndana be tinndi booydî, hono : Fowru e Njombolo ; Fuuybe tato ; Bone ficcat laaci, ekn. Heen sahaaji, o yimana be, O wiya : « Ndunngu uurii kam, weeyo furdii, asamaan yiwi... »

Kelmeendi

Dowri : gure jeeri dow, goddiide tufde mawde dee.

Loonde : nokku do ndiyam wadetee ; ko heen ko yimbe bee najarata koo ittatee.

Tiba : ina wona hudo walla sennge, wadetee ko e dow mahdi ndii.

Naamne fa'de e ko paam-daa e winndannde ndee

Hol ko addi ina wiyaa ndunngu oo moyyii hikka ?

Ko woni golle Rama so tawii worbe bee ndawi gese ?

Hol mo Rama e Yero badotoo so hiirii ?

Yerondir jammaaji gure dowri e di gure tufde mawde dee.

Hol ko seerndi dumen ?

Haal ko mba data so guurte ndunngu njontii ; tawa duše jaňde nguddii.



Joom oto e dadiido

Gorko gooto meedii ina dogna oto mum ; o wirtii do o fotnoo daraade ; o yawti. Ndeke dadiido ene mogginoo doon e nokkuyel. Doon tan, o yalti, o wutti sufle makko, o wiyi yoo joom oto oo daro. Oon darii- o wiyi mo : « Mate a yiyaani lampaaji dii ko ko ngojjunoo nde bennataa ndee ? » Joom oto oo wiyi : « lampaaji kay mi yiyiino dumen, ko aan oo wonnoo mo mi yiyaano ! » Dadiido oo jali, joom oto ne jali. Dadiido oo yebti kayitaaji oto dii kaňum e permi joom oto oo, o wiyi mo : « Ar mi winndan ma kayiit, nawaa to komisariyaa santaral, njobaa toon ko pawe-daa koo, duum ina yaha e teemedde jeegom, kaalis men ! »

Joom oto wiyi : « Ndeke, miin dey mi wadii ko mi wadtataa. A yiyi oo doo bone ! »

Kelmeendi

Dadiido : joom paftol mawngol hono sanndarma. Walla alkaati.

Sufle : liital

Bone : kala ko moyāani

Naamne fa'de e ko paam-daa koo e winndannde ndee

Waddube bee doo ; holi been ? hol ko woni golle mowoni e mabbe fof ?
Hol to duum wadi ? nder galle walla,
Hol no yahri ? hol tooňdo

Hol ko janngu-daa e ndee doo winndannde ?

Sahaa e sahaa fof, ada yiya dadiido ina darni joom oto walla joom jakarta. Hol ko addi duum ?

Haal e ko nganndu-daa e sardiji lelnaadī, gonandi dognoowo oto, dognoowo jakarta walla nii jahroowo teppere mum



Nguurndam men han̄ki

Ko welnoo ko ko wonnoo nguurndam men han̄ki ðam, pawinoodam tan e tobo e ilam. Tobo e ilam mbewnatnood kolce men, moyýinatnood nguurndam men, mooftatnood aadaaji men.

Kono gila dingire natti, jeewte, paykaaji, tinndi e daari majji. Gila mawbe natti tottude sukaabe gannde de be kuutortonoo, gila laamu tuubakiri naatni e men ko mum, mawnini e men ko mum, gila ndeen boomaare e ustaare beydanii en.

Hannde tobo e ilam definoodi nguurndam men nattii. Sooňo yaajii, heege bismiima hoore mum ; maaje, caadli, beeli beebii.

Hudo nattii, yi'eede, ledde njoorii ; mbaarudi sadtii. Sagataabe ndonkii, ndonkanii. Be puddiima hoyde do be paarnotonoo.

Kelmeendi

Kolce men : jawdi men ndariindi hono na', be'i, baali.

Payka : haala jalniika ka coolo'en ngoowi haalde

Boomaare : majjere ; woppude ko wonnoo.

(Nguurndam men hannde)

Naamne fa'de e ko paam-daa koo e winndannde ndee

Hol ko addi ene wiyee nguurndam men han̄ki eno welnoo ?

Nguurndam men hannde, ene weli walla welaani ?


Hol ko saabii duum ?

Hol ko ɻakki e nguurndam men hannde ?

E yiyannde maa, hol ko addi boomaare e ustaare kaaleeteede dee e winndannde hee ?

Hannde, hol ko woni safara ɻakkeende tobo e ilam ?

Haal mijo maa e cadeele mbiy-den ari e men dee.



Daarol Maalaw

Sammба Maalaw meediino yahdude e biyum, ebe njeeyoya bamngel mabbe. Sammbа noon ina yidi weltinde yimbe fof. O yidaa hay gooto fela mo walla sekana mo. O wiyi biyiiko oo : « Njahren koyde woto bamngel men tampude, mbele kadi engel wela yeeyde. »

Be coggi bamngel, be njahi seeda, be njiyi yimbe ina baayondira, ina njoofoo, ina mbiya : « ko oo gorko haangaa ! Ada tampa, aan e biye, odon ngoppi mbabba na yaha, on ndimndataa, on mbaddotaako... »

Maalaw wiyi biyiiko : « Ar, mbaddo-den mbabba men ngam eden njaawa yottaade to njahaten too ! »

Be mbaddii mbabba, be njahi, seeda, be potti e yimbe ene yeeyoo be, ene njala, ene mbiya : « yeew, yimbe dido e dow ngel doo bamngel pamarel doole ! Bee dey ngalaa yurmeende ! kooni ko bee tiidī berde... »

Kelmeendi

Felde : fawde neddo ko moyyaani ; ko o fotoani wadde

Joofaade : tobbude fedeendu mum fa'de e neddo walla godđum

Rimdude : fawde ko teddi e dow keeci mbabba.(Daarol Maalaw)

Naamne fa'de e ko paam-daa koo e winndannde ndee

Hol ko Sammbа Maalaw e biyum pewjani bamngel mabbe ?

Hol ko woni jikku Sammbа Maalaw ?

Nde yahi haa Sammbа Maalaw fottii e yimbe e laawol, hol ko been mbadi ?

So tawiino ko aan, hol ko mbadatno-daa e sahaa yimbe bee njoofoto ma, ena njala ?

Mande Sammbа Maalaw fuddii daňde cadeele ?

Haal e konngudi dabbi, ko paam-daa e ndee doo winndannde.



Nguyka Fowru

Fowru e besngu ngujjiino ngaari lawbe. Be njahi haa to buri sukkude e dunuuli, be kirsi ndi, be ngoni e wadde cette. Lawbe ko gayel gootel njoginoo. Be njoodii maa won balde didi, ngaari araani e mabbe. Be mbaddii bamdi mabbe, be pelliti yiiloyaade. Abe njahatnoo tan, haa be njani e Fowru e besngu mun ina ngoni e weltaare mawnde. Be naati e mabbe tan, be carondiri. Be mbadii feere haa be njaggi Fowru, be kabbi dum e mbabba haa tiidi ; be nawi dum wuro, be ngolli dum ko gujjo foti koo golleede. Be yebti teewu mabbe, be ngoni e ŋaamde.

Kambe lawbe abe njoginoo cukalel gootel. Ngel ŋaami teewu haa ngel haari ; ngel wiyi : « Haa goree, sinno Fowru wuurno dee, o ŋaamatno e kal bellal ! » Nde wonnou Fowru ina jarlibaa e ŋaamde, sikkitaaki heen hay huunde. Tan o wiyi cukalel ngel : « mido wuuri seeda ! ».

Kelmeendi

Dunuuli : ladde sukkunde, heewnde ledde e hudo

Yiilaade : ndaartude ko majji feeňaani tawo.

Sarondirde : mo woni fof yahri bannge

Naamne fa'de e ko paam-daa koo e winndannde ndee

Hol oon bone Fowru e besngu mum mbadii ?

No foti balde Lawbe bee njoodii njijaani gayel mabbe ?

Hol no be nganndiri wonde ko Fowru e besngu mum ngujji gayel ?

Haal ko buri koo fof jalnaade e tinndol ngol

Haal ko woni miijo maa e nguyka, maanaa yebtude ko jeyaani !



Dewgal 'Bayal Demmba

Ndeen Hammadi yimii haa booyii, yimbe bee ina kedanii mbo, be mbismii mbo nder galleeji mabbe. Be mbiyi mbo : « Gido, a jabbaama e wuro hee ! Ko doo wiyatee » Waasetaake-ngaraa-njidaa-kootaa-njeewnaa ». Suka burdo yonteede e nantude innde mum oo nawi mbo, jippinoyi mbo galle mum'en. Hammadi weertanaa, lelii. Weeti subaka, o wiyi embo dawa, sukaabe wuro ngoo, rewbe e worbe fof ngari, curi mbo, dabbii yo o won doon, o yeewta be hay so ko balde didi. Hammadi jabi, joodi. Sukaabe njidaa o yaha.

Be noddi mbo, be mbiyi : « Bayal Demmba mbo njippi-daa oo, ko o biy joom wuro amen mbo min njidi sanne. Embo jogori wadde doo dewgal e dee doo balde ; emin njidi kawraa heen ! » Hammadi jabi kadi, joodtii tawde o anndaa to o fa'i sabu ko o dogdo ngam hulde wareede. O joodii, o fadi yanne. Ko doon Hammadi anndondiri e Ciilal Sammba, gorko mawdo meednoodo lollirde naalaŋkaagu.

(winndannde ittaa ko e defter yeroDoor Jallo : Ndikkiri...)

Kelmeendi

Bismaade : wiye bisimilla ; yamirde yo koddo naat e wuro hee.

Yonteede : darjude ; wondude e daraja

Lollirde : anndireede, seedtaade waawde golle mum

Surde : teddinde kodo.

Naamne fa'de e ko paam-daa koo e winndannde ndee

Hol no gardo e wuro hee wiyatee ?

Hol no o naatiri e wuro hee,

Hol ko sukaabe wuro bee ŋaagii Hammadi ?

Yoyre nde Hammadi holli ndee, ende yubbii walla yubbaani ? haal mijo maa.

Haal ko seerndi yanne hanki e yanne hannde.



Fowru e Njombolo

Fowru e Njombolo meedii noddeede huirde caggal maayo, kono be ngaddanaaka laana. Te bawdi beldi ina piya caggal, pooye ina na kubba, ga'i ina na kirsa, ligga ina na njudee.

Fowru yidaa luuteede nduu doo ſaamanduru. O yeeyii e Njombolo, o wiyi dum : « Hol no mbadaten ? » Njombolo deyfii haa booyi, wiyi : « so tawii a jogoraani mi yennude, mida jogii feere no taytire ! » Fowru hebbitii, wiyi : « aan dey a anndaa ko kaalata : mballaa mi no tawtoroyaa-mi ndee huirde e nduu ſaamanduru, mi yennu maa ! Ndeen dey maa mi jaas banndiraabe am ! » Njombolo yaltini gaarawol e caggal mum, diwi, nakkoyii e duunde, diwti toon, ſiddoyii e fonngo. O rutti, o rewti e gaarawol mum haa beydii tiidde. Be njawti.

Fowru wiyi mo : « seydi Jah, o golli ko tiidi ! » Be ngaddanaa teewu judaado, be ſaami haa be kaari. Bawdi kakki haa njirwi ; amoobe ngami. Haa jamma jenngi, woodi biydo Fowru : « ko aan yontaa yimande yimbe. » Fowru wiyi : « Mi waawaa yimde, mi anndaa ko njimat-mi ! » Be mbiyi : « yim ko wel maa fof ! » Fowru fenti hello, darii e hakkunde, wiyi : « Miin e Njombolo njahdatnoo huirde caggal maayo, tawi laana woodaani. Doon tan Njombolo ḥabbinii, gaaraaji cufii e caggal mum.

O waggi hakkunde fonngo e fonngo. Min ḥaayi, min njawti ! » Gulaali ngulli...(Dum doo eggaa ko e deftere Tinndi e pulaareeje nde Abuubakri Dem winndi).

Kelmeendi

Luuteede : waasde tawtoreede e ko wadetee koo

Duunde : nokkuyel ngel ndiyam hurli

Fonngo : so ada tayta maayo, a ummoto e fonngo (bannge) ngaraa e fonngo

Naamne fa'de e ko paam-daa koo e winndannde ndee

Hol yahdube doo huirde caggal maayo ?

Hol ko saabii yahgol ngol toon ?

Hol cadeele Fowru e Njombolo nde be pelliti yahdude ?

Gooto e bee doo yahdube huirde ndee fiirtii aadi.Holi oon ?

Jikku mo Fowru holliri oo, ina moyyi walla moyyaani ?
Tottiree mijo mon fa'de hono njyree-don badtane cehilaagal Fowru e
Njombolo ?



Kosam enndu

Kosam enndu ina moyýí e nguura cukalel tokosel haa teenjti noon e tiggu. So cukalel tokosel wuurdii enndu yumma mum he nder lebbi jeegom (06) gadani díi, maa ngel dad e won ñabbuuli keewdi hono ndogu reedu, doyru, bade, came e ko nanndi heen. Dum noon yoo taw yummiraado oo ina ñaama kañum ne ñameele cellude, timmude e dow kadi omo taari ñaamde ko wayi no ñamako, gile, poobar, kafe... ngati kala ko yumma ñaami ko duum biyi mum muynata.

Kosam enndu ko ñamiri timmundi, duum woni ñamiri ndi nganndu-daa ini jogii kala ko ina fota wurnunde e mawninde cukalel, haa teenjti noon tiggu mo ina yahra e balde haa e duubi díidi maa tati- Kala ko balndu foti hatojinde mbele ndu mawna te kadi ndu sella, ina woni e nder kosam enndu. Kosam enndu ko ñamiri jogiindi gede nebnooze e mbeldam, e gede lamdaminooje. Ko duum wadi kosam enndu ina yona nguura muynoodo.

Kelmeendi

Nguura : ñamiiri

Ñawu : rafi

Taaraade : reentaade, riiwtude

Naamne fa'de e ko paam-daa koo e winndannde ndee

Hol diin ñabbuuli kosam enndu riiwtata e cukalel keccel ?

Hol ko yumma cukalel muynoongel foti taaraade to bannge nameela ?

Hol deen gede moyýude teskaa ina ngoni e kosam enndu ?

Haal bure kosam enndu de njanngu-daa e winndannde hee. Hol ko beydataa heen ?

Hol ko saabii ina wiyee wonde kosam enndu ina yona nguura muynoodo ?

Jamaanu oo jooni, hol ko buretee okkeede cukalel muynoongel to bannge nguura ?



Jontinooje

Ko bowdī ngaddata jontinooje. So bowngu ḥatii paawngudo jontinooje, ngu yaha, ngu ḥata neddo celludo, ngu raaba dum. Eden nganndi wonde yiyyam paawngudo jontinooje wadī ko kullon kon gite mbaawaa yiyyde. Ko koon kullon ngoni ḥonkotooji jontinooje. Ko dīin ḥonkotooji bowngu nguu tuutata e nder yiyyam celludo oo. Ndeke noon eden poti laabnude kodorde men dee, te kadi lelo-den e les fabiyonjaaji, ngubben kala do reewde ndiyam woni e nder walla e sara galle hee. Jontinooje noon ina paaydee e rafiji godđi. Dum noon ndeeno-dee wiye odon mbada safara memmbel.

Neddo ina waawi suuraade e jontinooje, so tawii omo laatini hono dīi doo wasiyaaji :

- Fuufde tooke barooje bowdī (yotox, ekn)
- Beebnude ndeebelon nder walla e sara galleeji ngam hadde bowdī dīi yeñde.
- Jargol lekde faljontinooje
- Daanaade he nder harkille (fabiyon).

So tawii a wadī dee doo gede, maa Alla wallu ndadaa oo ḥawu bondo, biyateedo jontinooje.

Kelmeendi

Jontinooje : ḥawu ngu ḥatgol bowdī addata

Ḩonkoto : kullel ngel yitere mehne waawaa yiyyde

Fabiyon : kabirgel bowdi ; engel hada bowdī ḥatde yimbe bee

Naamne fa'de e ko paam-daa koo e winndannde ndee

Hol ko addata ḥawu jontinooje ?

Hol no oo ḥawu jontinooje habirtee ?

Hol no bowngu raabirta celludo ?


So en njidii dadde e jontinooje hol ko pot-deen wadde ?

Won e maade ina keewi feeñde e paawngudo jontinooje : limtu dīdi (2) walla tati (3) e deen maale ?

So tawii hodorde laabaani, hol ko duum waawi jibinde ?

No foti fabiyonjaaji ngoni galle mon ?

Hol godđum mbadoton ngam habaade jontinooje ?



Ndogu reedu

Enen fof nganndi ndogu reedu moyfaani e mawdo saka e cukalel, haa teenji e ngel hitaande walla duubi didi. So ndogu reedu jaggi cukalel tan, ina tescaa wonde ndiyam ina jakka e banndu maggel, gite dee ina luggida, hunduko koo yoora, duure ndee (so tawii ko tiggu) naattita, domka tampina ngel. Nde kala hono deen maale tescaa e cukalel, so tawii suudu safrirdu woddaani doon, yo ngel nawe toon.

So ina woddi doon, ina haani ko yebteten hono liitar ndiyam laabdam, mbaden heen kate jeetati (08) suukara e kuddu tokooso keewdo lamdam ; ndillinen dum haa moyfa, totten mo o yara. O defanee kadi gosi gerte, o hokkee banaana so ina woodi.

Hadataa noon fewjee no o nawiree lopitaan. Reedu dogooru ko maale waylo-waylo jolngo e nder tekteki. Gede keewde ina ngadda ndogu reedu : hono ñameele de cellaani, teewu ñoldo walla kadi bidbe ledde ñolde.

Kelmeendi

Dakkere: waasde jogaade hay huunde, hay batte (hono yiyam , ndiyam)

Tiggu : cukalel keccel jibinangel ko ko booyaani

Naamne fa'de e ko paam-daa koo e winndannde ndee

hol ko ndogu reedu wadata e cukalel ?


hool no keebtinirten neddo mo reedu mum dogata ? ;

Cukalel ngel reedu mum dogata, hol ko foti okkeede to bannge ñamiri ?

Hol to ngel foti naweede ko buri yaawde ?

Cukalel ngel reedu mum natti dogde , no ngel wayata ?

Ñande heen, sehil maa, reedu mum dogi. Haal hono dum ardi e no gasiri.



Ndunngu

Ko e ndunngu ladde ndee wuurtata nde wonnoo tawi ledde dee mbiltii, beeli dii keewii ndiyam, hudo koo fudii. Ko oon sahaa yarnugol jawdi weebi. So ndunngu wadii, alaa e sago, jawdi ndii woddinee gese dee e ndemanteeri ndii.

Dum noon ndeke remoobe e aynoobe ina poti haaldude ngam nanndirde e lappi jottordi durngol. Jooni, yimbe e jawdi mbeltiima sabu duum leydi foofii, remoobe coftii.

Be njaltinii jambe e jale ; jinndaadí peewnaama. Rewbe e worbe, mawbe e sukaabe njaabanii gese jeeri- Bee ina njabba, luwa, ngaawa leyfí gaweeje. Beya ina coppa kocce, ina kowa galleeji- Pittaali mbeltiima ; mo woni fof ina golloroo anniya. So arii haa gawri ndii dadii e bone colli e tenke, ndi soñee, ndi lappee, ndi wadée e paabi. Remoobe cabboo e Waalo ; aynaabe nootanoo ŋaayngal.

Kelmeendi

Wiltude :

Jawdi : baali, beyi, nayi, ekn

Ndemanteeri : kala ko ina remaa : makkaari, gerte saaño, sammeeri

Naamne fa'de e ko paam-daa koo e winndannde ndee

Ko woni maale ndunngu ?

Hol no ladde ndee wayata so ndunngu naatii ?

Hol to jawdi ndii foti naweede so ndunngu arii ?


Hol ko weebi e nder ndunngu ?

Haal e no berde yimbe ciforii jooni-

Mate ngaynaaka ina yahdi e demal ?

Hol ko foti wonde darnde aynoobe e remoobe so ndunngu naatii ?

So gawri ndii soñaama haa gasi, hol to mooftetee ?



Ceedu

Ceedu ko sahaa nde dabbunnde yawti, nguleeki fuddii arde. Oon tuma henndu wulndu ummoriindu rewo ina wutta. Ko nduun henndu wiyetee mbooy. Ko ndeen kadi caanjli beebata, boyli korata, ledde ngoldata. Seeda kala, yimbe na njiya Jeeriŋkoobe bee ina cogga lappi na' i mum' en, ina payti waalo ngam abbaade hudo hecco e ndiyam laabdam.

Ko ndeen kadi Fuutanŋkoobe keewi dannaade : bee njilloyoo banndiraabe, beya paya gure teeru mawde ngam ndaartude koltu hade ndunngu arde. Ko e ceedu coňal waalo wadetee ; ko heen nguleeki fuddotoo wuttude wada keneeli hono mbooy, colte walla siilo. Ina jeyaa e maale ceedu colgol haako, ledde maayata, leydi fiddittoo wonta seeno meho e jeereende.

E oon sahaa duleedî ina mbadta yirlaade, ina njaha. So ŋawlii tan, yimbe, jawdi e kulle fof ŋallinat. Ko ndeen colli keewi naatde e luurooji ledde, ina ndoga nguleeki.

Kelmeendi

Caadngol : nokku do ndiyam saadata, duumoo doon.

Soggude : rewde e na'i ina nawa e nokku.

Murtoode : bidbe ledde ŋaameteede

Naamne fa'de e ko paam-daa koo e winndannde ndee

Hol ko woni maale ceedu ?

Limtu yoga e keneeli guttooji e ceedu.

So nguleeki wadii tigi rigi, hol ko colli keewi wadde ?

Jooni, hol no nganndirtaa ceedu naatii ?

Sifo hono duleendu wayi. Mate duleendu ina wada jamma ?

Haal mijo maa e ko weli e ceedu e ko metti heen-

Saanga mo ngon-den oo jooni, ko ndunngu walla ko ceedu ? Hol ko addi mbiy-daa duum



Darnde debbo pullo e nder renndo mum

Debbo pullo ina foti reende e won e sifaaji men booydi, di finaa- tawaaji men. Hono diin sifaaji ko cadtudi huurde jamaanu men hannde oo.Ndeen Fulbe na mbiyatnoo wonde debbo so yidii barkinde : o tikkataa; o dukataa ; o ñermataa; o tayotaako ; o welataa teppere walla demngal ; o nokkataa mawde so omo ñaama.

Ndeke noon, e yiyannde Fulbe, debbo pullo barkindo ko debbo deeydo, kersoowo mawbe, jahroowo seese, mo heewaani ñaamde, dabbudo koyngal, muñdo, teeydo. Hadaani noon, enen fof eden nganndi darnde debbo e bamtugol leñol, haa teenji e bamtugol demde ngennadije, ko huunde tiidnde no feewi. Ko debbo woni toppitoodo cukalel, nguura mum e nehdi mum, gila ko o tiggu haa o diwa.

Ko e debbo cukalel ekkotoo ko buri heewde e demngal ngal. Debbo pullo, haa jooni, ina maantoree nehdi mum e darnde mum e teddinde jiknaabe mum, e toppitaade diine mum haa o resoyee walla haa do o ruttii do o umminoo, duum woni galle baaba makko.

Kelmeendi

Finaa-tawaa : aada booydo

Huurde : reende tawa majjaani

demde ngennadije : demde de musnu-den e enndu yumma men.

Naamne fa'de e ko paam-daa koo e winndannde ndee

Debbo so yidii barkinde, hol ellaaji o foti dogde ?

Hol no debbo bamtirta leñol mum

Ko woni yiyannde maa e darnde debbo hannde e renndo men ?

Hannde, hol toppitiido cukalon kon nder galle mon ?

Haal ko woni miijo maa e ndee doo winndannde-

So tawii ko darnde gorko pullo wiyanoo. Haal kadi ko woni miijo maa.



Nguurndam leňol hanjki

Ndeen, ko worbe ngiwnra gaa, rewbe ngiwnra gaa. Sukaabe njaha gedduuji beyi walla hudumaaji baali. Be kocca murtoode gaacaade. Rewbe toyfa de, kama de. Nebam yaltinee heen. Be mbada paali njuumri. Gerte dee kamee, yaltinee heen nebam. Be Cuma heen caabune. E oon saanga, Fulbe ina njogii nebam gerte, nebam sirme, nebam murtoode e njuumri.

Kodo fof gardo e wuro, o teddinee. O soodanee goro, o waranee njawdi. So a yaltii wuro maa, o arii e wuro wodngo, boombi cura ma, sukaabe teddina ma. So tawii ko suka debbo ari e wuro mon, onon sukaabe worbe bee, coodon goro, teddinon mo.

So omo hoota, ngabboron-don mo pucci haa to wuro makko too. Jamma, so yahii haa hiirii, sukaabe bee piya bawdi, be njima yellow, be mbiya :
« Eey yellow yellow, Sinno yellow ko janđe
Tawatnoo mi dursi Aan hey kaari
Mijoo-daa kaari, gidel maa
Tiidno diw diwngol lella
Haa mbadtaa yahdu dooño ».

(Egga ko e winndannde Baylaa kulibali. E nguurndam Tumaranke. Bindi e jannde, 1991)

Kelmeendi

Murtoode : bidde ledde ñaameteede

Hamde : bidde ngam yaltinde nebam, biradam wala ndiyam.

Jumoyde : yahde e nokku do ñaaki mbadfi njuumri ngam ina riiwa di haa heba e njuumri hee..

Naamne fa'de e ko paam-daa koo e winndannde ndee

Jamaanu men hanjki, hol ko wonnoo golle yimbe bee ?

Haal ko worbe e rewbe mbadatnoo ?

So kodo arii e wuro, hol no o jabbortenoo ?

Kodo arii galle maa walla wuro maa. Hol no o jabbora ?

Jabbagol kodo hanjki e hannde ; hol ko seerndi dumen ?

Yim jimol gaandanteewol (cosaan) ngol nganndu-daa ?

Haal no njiyru-daa ndee doo winndannde ?



Njeeygu Kosam e nebam

Fulbe ina ngaadori fenndude kosam, be kuuya ketungol ngol, be njaltina nebam dám, be kaayna dám, be loowa e paali, be njeeyoya dám e dugge hee. Hade dugge dee heewde hono jooni nii, kosam dám rimndetenoo ko e bamdī, nawee to gure mawde too, wostee gaweeje walla kaalis. Ko duum wiyatee cippal.

To bannge tawaangal, Fulbe buri naftoraade na'i mum'en ko to bannge kosam, kono wonaa to bannge teewu. Pullo fof ina softiri birde nagge mum, ūaama, kono softiraani hirsude nagge mum, ūaama. Ko nagge ūalli durde fof ene feeňa e keddam magge. So tawii kudol ngol ena lammi, biradám dám lammat, so tawii engol uuri biradám dám uurat.

Kelmeendi

Huuytude : ittude lefol dowdowo ngol.

Haaynude : defde

Cippal : okkude kosam mum, ruttee gawri walla kaadis.

Naamne fa'de e ko paam-daa koo e winndannde ndee

Hol ko woni aada Fulbe ?

Hol ko Fulbe buri huutoraade e nagge ? Hol ko saabii duum ?

Hol ko woowi feeňde e keddam nagge ?

Haal yoga e ko nganndu-daa e nafoore nagge.

No foti leyfí nagge nganndu-daa ?

Ko woni yiyannde maa fa'de e musidal hakkunde pullo e nagge.



Hakkunde debbo nayeejo oo e njur-demmba

Ko debbo nayeejo hodnoo e nokku. Omo nehi baali haa heewi. Omo wondi e taaniraakon makko. Subaka gooto, omo joodii damal galle makko, omo moora cukalon kon, haa njur-Demmba tawi be doon. O wiyi kañko ne omo ari mooraade. Nayeejo debbo oo wiyi mo o waawaa mo moorde nde tawnoo loyi mo o moordata oo welaani. Njur-Demmba wiyi duum alaa ko bonnata. Ndeke njur-Demmba ina wondi e gaañannde mawnde e hoore. Nayeejo oo nde memi hoore ndee tan, yiyyam suppitii, duli haa heewi. doon e doon Njur- Demmba wiyi “kafeet” ummii.

O oolii gulaali, O wiyi yimbe wuro ngaree, yéewee ko Nayewel wadí mi. O wiyi ko maa o yobee, te o yobetee tan ko njawdi. O yaabani geddu oo, o fiirti njawdi mawndi, o nawi. Hanjadi, subaka fof, o arana njawdi wonndi, haa heddi tan ko wootiri. Alla wadí kaaw-Mbaroodi rewi ; doon, wiyi : “hii, Nayewel, hol to baali maa ngoni?” Nayeejo oo haalani mo fof no huunde ndee yahri. Kaaw-Mbaroodi wiyi mo : “Ko nii, mbadaten; habbu am do kabbu-daa doo ndiya njawdi haa Njur-Demmba ara, wiya ko miin habbitta!”

Kelmeendi

mooraade : Sañde sukunde hoore, wada gati.

loyi : jamngel kuutorgel ina wayi no meselal mawngal.

geddu : nokku do baali walla beyi humetee.

Naamne fa’de e ko paam-daa koo e winndannde ndee

Hol been tawtoraa e oo doo fitna?

Hol ko waddi Nayewel e Fowru?

Mbaroodi arii, sakkii feere: hol ko o fewji?

Oo jamaanu mo ngon -den hannde, so a yidii mooroyaade walla femmbaade , hol to njahataa?

Jooni kaw-Mbaroodi habbaama do njawdi ndii habbetenoo.

Haal no njiyiru-daa ko jogori koo wadde so Fowru arii-

E ndabba, haal ko woni koo mijo maa e ndee doo winndannde.



Farmata e Kummba

Farmata e kummba koddi ko e galle gooto. Ebe njydi baaba kono be njydaani yumma.Jibini kummba ko ayse konon ko Faati woni yumma Farmata.Be ngoniri noon haa Alla wadi Faati, yummum Farmata sañkii. Hankadi noon, Farmata wontii baayo. Woni haa dabbunde naati, commeeje e ñaayko ina ngari e benndude. Colli mbadti de jippaade, ina ñaama. Oon sahaa jom ngesa fof nattii daanaade haa weeta. Yimbe ngori e dawde law ngam reende colli wata bonnude ndemanteeri ndii-Ayse, yummum kummba, noddi be kambe bee dido. Owiyi yo kummba yah reena ngesa burba baa bado wuro ngoo, Farmata Kañum mo yummum alaa doo oo yo yah to ngesa burba baa bado woro ngoo, Farmata Kañum mo yummum alaa doon oo yo yah to ngesa burba baa woddu. Doon e doon mijo Farmata ruttii e neene makko biirniido oo, Faati.

Gite makko mberlii gondi. Kono, tawde o suusaa salaade, te kadi o alaa feere wonnde nde o wadataa haa o waasa yahde, o jaggi e Alla, o jabi ko Ayse, mo jibinaani mo oo, haali koo. O dawi, o woni toon kanjotan, o Alaa jeewtidiido hay gooto. Alla reeni en haa kikiide les, gorko gooto, biy laamdo diiwaan oo, ina waddii ndimaangu mum, ina wondi e maccube mum, ebe ndadda gerle, jaawle e lelli, o ari, tawi mo doon. O yiyi mo tan, mijo makko ari e resde mo. O badii, o salminimo. Farmata salmitii. Biy laamdo oo wiyi : « Hol to kod-daa ? Hol jiknaabe maa ? Farmata jaabii, haalani mo to o jeyaa, haali gondo baaba mum-Nde tawnoo biy lamdo oo yiyii mba'di e ndii nehdi Farmata, o fellitii hankadi resde mo.O wiyyi yo maccube makko bee njahdu e Farmata, mbiya jiknaado gorko oo, tuggi hannde, o resii Farmata...

Kelmeendi

Sankaade : maayde ; nattude w提醒.

Baayo : mo jiknaabe mum dido walla gooto e mabbe maayi.

Dabbunnde : waktu nde ndunngu gasi, coñal ina waddee, ceedu ina jogori naatde.

Naamne fa'de e ko paam-daa koo e winndannde ndee

Hol ko Farmata e Kummba njydi ?

Hol ko saabii yimbe na ndawa law nde dabbunde naati ?

Saanga nde reende gese yonti, hol oon e Sukaabe rewbe bee wiyaa yoo yah to ngesa burba woddu baa ?

Biddo laamdo diiwaan oo, hol ko o felliti wadde ?

Jooni Farmata wonii cuddiido biddo laamdo oo ; mate Kummba e baaba mu mina mbeltoo e duum ? hol ko saabii jaabi-daa ko jaabi-daa koo ?



Hakkunde Njur-Demmba e Kaaw-Bojel

He oon jamaanu, kulle ladde dee na kaala ñemde de kaalaten dee hannde. Joodii haa wadi ñalawma gooto, Njur-Demmba nani wonde yanngé mawngé ina wada e wuro wooto e gure Fulbe dee. Demmba na yidi yahde kono suusa nde wonnoo nokku oo ina woddí seeda. O yahi, o tawoyi Kaaw-Bojel O wiyi dum « Kaaw-Bojel, a nanii ko man-mi ? Yanngé na wada too to wuro Fulbe. Kaaw-Bojel wiyi: A yiyyi, ngon-mi ko e heblaade, mido jogori fokkitde jooni Njur-Demmba wiyi : “dum noon, njahden”.

Be keblíi, be naati e lawool. Be njahi seeda tan, asamaan yiwi fuñnaange e hirnaange. Be ndaari, be tawi ko maa be duwoo. Kono be ndañaani nokku do be duwii. Kaaw-Bojel wiyi Njur-Demmba! Miin dee so tawii a haaloytaa, mi taya noppi am, duwo-den haa tobo ngoo siilta Njur-Demmba jaabii, wiyi: Hol miijotoodo duum? Mbadaa ko moyyi, mi yob ma ko boni? Kaw-Bojel tayi noppi mum, be duwii. Be benni...

Kelmeendi

Huunde ladde : barogel Alla taweteengel e ladde

Yanngé : so dewgal humaama haa gasii, sahaa mo debbo oo ina nawee to galle jom galle mum. Ina anndiraa kadi ndiftungu.

Yiwoonde; sahaa nde baañe baleeje kirim muuri asamaan, tobo jogorii tobde.

Naamne fa'de e ko paam-daa koo e winndannde ndee

Hol ko wadata too to wuro Fulbe ?

Nde tawnoo Njur-Demmba suusaa toon yahde kañum tan, hol feere o lelni ?

Nde be njalti wuro ngoo, hol ko heftii be ?

Hol feere be pewji ngam yidde dadde ?

So neddo wadanii ma ko moyyi, hol ko pot-daa mo ruttude ? Mate Njur-Demmba yobii Kaaw-Bojel moyyere mum ?

So tawiino ko aan darinoo darned Kaaw-Bojel, hol ko mbadatno-daa ?



Kawgel burdo wonde suka

Kullon ladde meedii noddeede, wiyaa kala burdo wonde suka ina rokkee ngaari e gallaadi mum. Ko wonnoo e ladde fof ari, joodii Gooto fof woni e haalde hitaaande nde jibinaa. Bee mbiya nde jibinaa wonii duubi didi ; bee mbiya wonii hitaande, beya mbiya wonata tan ko balde... Ko doon tan Njur-Demmba haftii, nabbi e leggal, boccitii toon, ina wiya :"ndaaree, ndaaree, mbodo nii jibinee ...

Fof hawrii ko Fowru buri wonde suka. O hokkaa ngaari ndii. O boorti ndi,o fa'ri ndi galle makko. Nde Sira, joom suudu mum Fowru, yiyo omo ara, omo sogga ngaari, o ari, o jabbii mo, o wiyi: "Hayyoo ! Njool am arii, addorii ! Ndaaree Ko Njur Demmba am wadani mi !"

Kelmeendi

Kullel ladde : kullel kodngel e nder ladde hono lella, fowru, wojere, ñiiwa, mbaroodi,

Soggude : addude e nokku

jabbaade : arde ina doga, ina fayi e garoowoo

Naamne fa'de e ko paam-daa koo e winndannde ndee

Haal no njyru-daa feere Fowru ndee.

Sifo e ndabba, kawgel ngel tawtore-daa walla ngel nan-daa ina wadi

Haal ko njanngu-daa e ndee doo winndannde

E yiyannde maa, hol baawdo noddude hono oo doo batu?

Ko woni sabaadu noddaangu nguu ?

Nawdo raaya oo, hol no o wadi ?



Sammbo

Wonnoo ko gorko gooto, omo wiye Sammba. O hoddi ko e jom suudu baaba makko didmo. Alla wadi Sammba ko e sukaabe burbe yonteede he wuro hee o limtetee. Do njah-daa fof ko innde makko nanataa, ko kulle makko kaaletee. Ndeke duum addii kirndam mawdam e berde sehilaabe makko he. Be nganniyii mo sankude. Be pewjani mo. Be njahi to Jinne Jom Maayo ngoo, be mbiyi yo Jinne oo wallu be, wara Sammba.

Woni haa hiiri sukaabe worbe e rewbe njalti e dingiral wuro ina pija, ina njala, Ngaari Jinne ari, wiyi : « Hol biyeteedo oo Sammba ? » Fof dogi, mo woni kala yaabani galle mum-Sammbo ne hucci galle. O tawi ina uddii haa tiidi. O noddi baaba makko, o noddi nawliido yumma makko, hay gooto dillaani. O aani, o anndaa ko o foti wadde haa o nani debbo oo ina wiya jom galle mum: " so a udditii tan, miin mi yaltat galle maa, mi seera ma, mi daccida ma e galle maa !" Ko nii, baam mum Sammba leltii, daankinii. Jinne-Jom-Maayo ari, tawi Sammba ina darii e damal galle mum'en. Galle ina uddii, o waawaa naatde, o alaa do o fa'i. Ngaari Jinne wiyi mo : "ko aan wiyatee Samba ?" Sammba wiyi : "Eeyi, ko miin woni Sammba!" Jinne wiyi mo : "Woto hul, mi wadataa ma hay batte ! mbido anndi jikku maa moyfudo! Ar, njahden, won ko njid-mi tottude ma!" Be njahdi daande Maayo.

Ngaari Jinne wiyi mo : "Fad am doo, jooni mi ara!" Sammba fadi. Booyaan ni Jinne yalti e ndiyam, wiyi mo: "Ndaa, mi hokkiima ujunere e kala ko wadi holsere, ujunere e kala ko wadi takkere, ujunere menkelle kanje e kaalis!" O beydi, o wiyi mo : yah, kono wadan hoore maa hodorde, tawde hay gooto yidaa ma e wuro hee!" ko nii Sammba eggi, wadan hoore mum wuro ine wiye "wuro Sammba".

Kelmeendi

Yonteede : darjude, nantude innde mum.

Yaabande : fa'de.

Daankinaade : ñemtinde honono daaniido wadata.

Naamne fa'de e ko paam-daa koo e winndannde ndee

Holi been kaaletee e nder ndee doo winndannde?

Hol ko wadi? Mande duum wadi ?

hol burdo fof darjude e wuro hee?

Won ko darja suka addanta joom mum. Ko wayi no hol duum?

Nde Jinne-Joom Maayo ari, hol no duum yahri ?
So tawiino ko aan darii darnde Sammba, ko mbadatno-daa?
Haal e ndabba ko woni nafoore winndannde ndee.
E nder dudal mon, hol burdo nantude innde mum ? Haal ko nganndu-daa e makko.



Sooroyamma

Hay so tawii fulbe hannde ena ñiibi he diine Lislaam, be ngoppaani aadaaji e cosaan mum'en. Kono noon, fulbe tinndii mbiyi : « Waandu, kala ko ndu naywiri, ndu waalataa to leydi ». Ko duum addi haa he kafuulu diine Lislaam mbirni kafuuli fulbe hanjki, Soorooyamba noon ko e dñin kafuuli birnaadi jeyaa. Sukaabe, tawde kobe njidbe pijirlooji, ebe keblanoo sooroyamba gila siwaayonde. So ñalawma oo yontii, a tawat hay mawbe bee ena mbadti heen kakkilaaji mum'em no feewi sabu ko kambe peewnannta ko sukaabe bee kuutortoo koo jamma

Duum noon fuddoto ko gila futuro ngoo heewaani sukaabe bee puddoo naatde galle he galle kala, ebe mbiya « mbooliyel ! mbooliyel ! » Ko saabii ebe mbada noon haa be ndokkee ko wayi no cobbal, bomboŋ, walla tanngal ekn.

So hiraande deftaama, sukaabe kiirtiima lacciri e teewu haa deedi mum'en mbiyi ñoy, be kebloo, be ñaañtoo haa feewa, be gummanoo hirde ndee. E oon saanga a seerndataa suka gorko e suka debbo. Rewbe bee ina mbayi no worbe, worbe bee ina nanndi e rewbe. Ko nii be kiirdata, ebe piya, ebe njima, ebe naata he galéeji ngam yiilaade ko wayi no ngawri, maaro, kaaleesi, haa jamma woddo. Sooroyamba ina wayi tan nih ko no feetu mbi'etee "carnaval". Ko buri weydude heen fof, Sooroyamba ko cosaan, aada e diine kawri ngoni go'tum. Duum noon, enen banuu Aadama, kala do mbaaw-den wonde e kala ko mbaaw-den wonde, kawren ngonen go'to!

Kelmeendi

ňiibde : duumaade e nokku, booya doon.


Cosaan : aada, finaa-tawaa

Banuu Aadama : neddo mbo Alla tagi

Naamne fa'de e ko paam-daa e winndannde ndee

So tawii aan oo ada wada sooroyamma, hol no keblorto-daa to bannge comci e to bannge bawdi.

Haal e haala ndabba, cifo-daa jamma sooroyamma bennudo mo tawtoreno-daa oo.



Dennaboo

Dennaboo walla innde-booboo, hono no nganndir-den dum hannde nih, hol toonetholtumafuddii? Haambaawenjaabbaadengaldoonaamnal, naamno-den taarika. Kono e , fii rabbindinde haala, mbiyen fa wonde en nganndaa.

Kono hadaani, dennaboo ena wadee e nokkuuji keewdī e sifaaji keewdī. To bannga fulbe, dennaboo ko ndokkugol innde cukalel jibinaangel booyaani. Ena wadee e ñalawma cukalel ngel jibinaado do arti, maanam balde jeedidī caggal jibineede ngel. Musidbe e hoddīibe ena tintinee ngam tawtoreede e oon doon ñalawma. Dennaboo ko e cosaan jeyaa fulbe. Ñande heen, njawdi walla mbiyen ngaani mbaalu, ina heewi hirseede

Wodbe noon ina mbada ngelooba, ngaari nagge walla gertogal. Ko fa'ti noon he innde nde cukalel ngel fotaa okkeede ndee, duum ne kadi ina fawii he gede keewde. Eliman oo ina waawi yeewande cukalel ngel innde caggal nbe jiimi e defte makko, jiknaabe cukalel ngel ina mbaawi yeewande ngel innde he nder musidal mum'en maa koddigal mum'en. Go'to he musidal hee maa he koddigal hee ina waawi ñaagaade innireede cukalel ngel, ekn. Kafu dennaboo noon ko ñalawma go'to tan booyata. Hakkunde neddo noon he mo o inniraa oo teddungal mawngal ina doon sabu nginniraado ina wadana innordo mum gede keewde haa ko wa'i no okkude mo maa ndaartande mo debbo, so ko gorko, walla wonde kaliifa makko, so ko debbo.

Kelmeendi

Dennaboo : innde, pemmugal. Dii doo konngudī fof toddī ko dokkugol innde cukalel jibinaangel tawi hebi tan ko yontere.

Kafu : wayi tan ko no juulde nii ; ñalawma weltaare mawnde.

Jiknaabe : yumma e baaba jibinaado oo.


Naamne fa'de e ko paam-daa e winndannde ndee

Mande dennaboo wadetee ?

Hol ko woni sabaabu joodnde elimaan oo ?

So tawii ada jogii tokora, hol no o wiyatee ? Mate omo musidi e jiknaabe maa ?

Winndu walla haal e ko rabbidī fa'de e kafu dennaboo mo tawtore-daa booyaani.



Debbo jeeyatdo gertoode

He oon doon ñalawma mbuldo nguleeki mawki, gaaraas Caajaay oo tawi in heewi dillere. Ko doon woni nokku buraađo hormoreede he jeere ndee, sabu ko e hakkunde gaaraas hee laawol Ndaakaaru e Kawlak ngol rewi. Kono engol hulbinii he been be nganndu-daa taccitat ngol e banngeeji dii fof, buri heen teenjude noon been be ngandu-daa ko e hqkkunde kalluuji he be njeeyata tawa ebe ngadondira e otoojidii-ngam yiđde yeeyde wonbe e ðanngal bee. Juma Juuf ko debbo njeeyoowo gertoode. Kala nde oto ari, o heñoo o wammaa biddo akko oo, o jagga gertogal e junngo, o yaawnoo o faya to oto too ebo wi'a: "Gertogal! Gertogal!".

Oto-kaar mawdo yottii, tawi embo heewi tep ðanniyanikoobe. Juma ummii ñukkat, e heñaare makko, o faaydinii gertogal ngal e biddo makko oo. O wammbi gertogal ngal, o jaggi e koyde biddo makko, o weelnii. O dogi o fayi to oto too embo jaggi e koyde cukalel, ombo toowni ðum to dow embo wi'a: "gertogal! Gertogal!". Cukalel ngel ina tan woya, gertogal kañum ne ina jogga he dow keeci makko. Go'to he jolbe he ndeer oto bee naam-nii Juma: "Hey! aan kam, ko ðum do woni gertogal maa ?" Juma ndaari kaaldo oo e nder oto o tan, o yani he lesdi, embo wiya: "Wooy heegam!". O woppi gertogal ngal o dogi, o yahi to buubri too ngam eeltude biddo mum ngoyoodo oo. Dendi mum Kadi Fay woni he tooñde mo ina wi'a mo: Ko njettaado Juuf tan wadta hono nduu doo waddu!

Kelmeendi

Gaaraas : nokku do otooji nawooji ðanniyanke en ndarotoo

Heñaade : wadde ko yaawi

Wammbude : habbude e keeci mum

Naamne fa'de e ko paam-daa e winndannde ndee

Hol ko wadi to gaaraas Caajaay?

Hol been tawtora oo doon kewu?

Hol musidal woni hakkunde Juma Juuf e Kadi Fay ?

So tawii ada foti waajaade Juma Juuf hol ko mbiyataa mo ?

Haal e ko nganndu-daa e dendiraagal.



Wasiyaaji fa'de e duhiido

Ngaari! So Alla wadii a yaltii e jam, so dee kaddulle gasii, so mawniraabe maa worbe nelii ma to sukaabe rewbe, jab e yaawde yahde sabu dum ina janngin maa gede kuule aduna. Kono noon so be nelii ma yo addan be simme, ado foti salaade duum sabu simme moyfaani, simme bonnat cellal balndu. So ko yammbaa be neli ma yo a addan be, salo e doole maa fof sabu yammbaa wonaa ko ko moyfi, ina waawi ma wadnu golle bonde, no kaanggaado wadatanii.

So tawii noon ko dorog be mbiyi ma yo a soodan be, doo kadi ada foti salaade sabu, duum ina waawi ma addande hono dii piiji tati: bona w提醒 maa fop haa wad ma njelotoodo walla wad ma gujoodo walla addan ma jikku bondo, wad ma tan no rawaandu nii, ko boni fof mbadaa dum ; ada ñaama ñaameteeji bondi di celludo fotaani ñaamde.

So a wayii noon, hay gooto yidataa ma, kadi honon duum ina waaw ma yaltinde galle baaba maa, addana jidnaabe maa lorngo ngo gasataa, nguuraa e mbeddaaji fodde ko heddii e nguurndam maa.
Ado anndi dum doon dee wonaa ko ko mooyfi.

Kelmeendi

Kaddule : sunnineede ; naatde e suudu worbe, naatde e sukkere

Salaade : waasde jabde ko wiyaa walla ko rokkaa

Mbedda : bolol


Naamne fa'de e ko paam-daa e winndannde ndee

Hol ko wasiyaa duhiido oo e nder ndee doo winndannde ?

Hol no nji'ru-daa dii doo wasiyaaji ?

Hol ko seerti duhiido gondo e tufnde e duhiido gondo to dowry.

Hal ko mbasiyano-daa sahaa nde naat-daa sukkere.



Hono maafe gerte defirtee to fuladu

Maafe gerte ina tawaa e ñaameteeji buraadi yideede to Fuladu. Ko duum wadi ko maafe gerte fuladunaabe burata defde. Maafe gerte noon so ina defee, buraa heen yideede ko dee doo gede : tigadege, be mbadtida dum e mentuñaaje, e liiddi walla teewu (hono no no kattande mum'en poti), e gile, e tamaate, e laalo kaññje ngam no maafe oo moddiri.

So dee doo gede fof kebiima, beydee heen hono pobaar, jimmboo, laay, basalle ekn. Jooni noon so en nedefat nii maafe gerte, ngadotorto-d'en ko jiibde tigadege oo njiibden dum e ndiyam e mentuñaate dee e tammate oo, looten teewu dum haa moyfa, naatnen dum e barme hee.

So doon gasii, yebten barme dee, pawen e kaatane tawa jayngol hubbaama haa gasii. Jooni heddi ko yo en toppito nokkos oo (o waddetee ko pobaar, laay, gile seeda, basalle, jimmboo, lamdam seeda).

Eden ngaccunoo maafe oo ina faya, jooni o fayii haa o arii e benndude yebten nokkos oo naatnen e maafe hee, kono hade duum fof, tawa en mbađino e ndeer maafe hee, ko wa'i no pataas, buudi, karoot, suppame, ekn. Ngaccen dumen faya haa bennda. So tawii maafe oo na leppi seeda mbaden heen laalo ko hawri. Hankadi defgol maafe oo gasii heddi tan ko yo o ñaame, waddee e maaro

Walla foňño walla kodde, ekn..

Kelmeendi

Tigadege : gerte cahaade, gunaade haa diggi

Moddude : tekkude

Jiibde : jillindirde, waddude jiiba haa modda

Naamne fa'de e ko paam-daa e winndannde ndee

Hol deen gede poti huutoreede so tawii maafe gerte na defee ?

So ada defa maafe gerte hol ko ngadoto-daa wadde ?

Aan ne sifo e ko mbaaw-daa defde.

